Item, che 'l Signor turco, non solum desidera la pace con la Signoria nostra, ma con tutti i altri per star în reposo e impir el suo casnà; che al presente non trova altro Dio che quello. Non ha el ditto orator cossa di momento in commission. Rechiederà i capitoli di la pace in franco over greco, e che si zuri la pace. Etiam per condolersi di danni fati a subditi dil Signor per quelli di Schyros e Schiati. Etiam parlerà di danari di Chasimbeì, qual è afficionato di la Signoria nostra et è streto con Mustaphà bassà. Item, lui à zerchà levar il capitolo di beltramazi, e che fusse fato a la Signoria nostra uno più honorevole presente per l'ambasador; ma non potè. Et quanto a li beltramazi, risposeno li bassà al presente non si poter conzar alcuna cossa, e lui disse li nostri marchadanti non verano. Li bassà disseno il Signor non vol ussir di la sua leze. Li rispose è solo per venitiani, chè le altre nation stanno e non soto-487 stazeno a tal capitolo. Item, à tentà la liberation di sier Marco Orio e altri presoni licet non habi auto mandato, e col favor di Mustaphà bassà, tentò di sier Baptista Polani. Li bassà feno arz et il Signor rispose poteva pagar ducati 20 milia. Item, lui vice baylo, volea scuoder i bailazi da' venitiani, ma è capitati li alcuni bazarioti, quali li dicono è subditi nostri e di qui venitiani. Item, i fioli dil qu. Amar beì fo robato da le fuste de Schiro, si lamentò a la Porta; poi disse non era de Schiro, ma è stà di Schiati. E però, è bon dolersi con ditto orator di beltramazi non aver voluto dar li capitoli al nostro baylo di la pace, zoè la copia. Item, avisa, si la pace non fusse, si haria carta biancha. Et de li è gran carestia; val li formenti a 34, nè si pol aver si non da Negroponte, perchè in ogni loco non ne è, et in Grecia e Turchia moreno di fame. Item, prega la Signoria li dagi la so' taja ducati 400, et sperava levar l'usanza nova per il sanzacho di Galipoli posta, et eri a la Porta li bassà di questo feno arz, e poi risposeno è comandamento dil Signor; sichè 'l vede le cosse va di mal in pezo, e quelli non voriano baylo; però aricorda si mandi presto el baylo. Item, è roto a Cao di Janizari in quelli di una charavella di schiavoni nolizata a Rhodi per certi bazarioti, su la qual era peze 900 charisee e stagni; sichè il forzo è perso. Item, di novo nulla zè; ma tutte merchantie dormeno rispeto le carestie et morbi che mai non mancha, benchè al presente sia pocho mal.

Dil ditto, di 27 ditto. Come, hessendo a la Porta, li bassà lo chiamò e mostrò lettere di 3 janizari presoni a Schyro et uno era prima morto. E usono stranie parole, dicendo, si la Signoria non vol

e non pol provederli e castigarli, ne dagi licentia a nui. E lui baylo disse la Signoria li castigaria. E volseno el mandasse uno suo a Schyro e Schiati per li danni predicti, e cussì farà.

Da Monopoli, di sier Lucha da cha' Tajapiera governador, di 21 fevrer. Come avisò quanto fu fato per spagnoli nel monasterio di San Francesco, e dil venir lì de domino Zorzi Bocali. Al presente, avisa el di sequente vene da lui domino Thodaro Bocali suo fradello per nome del vice re di quelle provintie, qual è vicino con le zente e asedia Conversano, e replichò il protesto. Li rispose ut supra, dolendosi di quello spagnoli fevano, et non era per darli nulla; ma ben che de cætero non aceteriano più francesi. Item, ogi terzo zorno, alcuni soldati yspani hebe ordinamento di andar a la razza nostra e andono. Batè li guardiani; tolse poliedri e jumenti numero 200, e li conduseno in Fusano con 17 poliedri di sier Antonio da cha' da Pexaro che passavano pocho lontano di ditta razza. Mandò il suo canzelier et reave ditte jumente e poliedri, e quelli 487 di sier Antonio da cha' da Pexaro rimase dicendo averli comprati a Conversano, e li conduseno verso Taranto. E inteso questo, li mandò do cittadini a ditto vice re et esso sier Antonio da Pexaro a dolersi, et qual comandò li siano restituiti, dicendo tutti sti danni si feva senza sua licentia. Item, per quella università, è stà provisto di 25 cavalli a guardia di quel teritorio, domente spagnoli stanno li intorno.

Da poi disnar fo gran Consejo, e fu fato do patroni a l'arsenal, sier Piero Marcello qu. sier Filippo, e sier Piero Baxadona qu. sier Antonio.

Et reduto il Colegio, veneno alcune lettere di Rimino, qual poi la matina sequente iterum fono lecte in Colegio.

A dì 18 marzo. In Colegio. Vene l'orator di Franza domino Acursio Mavnieri, qual a 'uto licentia di ritornar a caxa, e tolse licentia, oferendosi etc. e tochò la man a tutti. Tamen, non li fo fato le spexe per le terre ni donatoli alcun presente; solum li soi danari che restava aver di mexi do etc.

Vene Piero Zuane di Forlì, qual alias menava la trama di Forlì, e fo aldito con li Capi di X. Credo quel signor voy far il tutto con la Signoria, perchè li vien stretto li panni a le spalle dal papa; tamen questa terra non si vol impazar di Forli. Nescio quid dicesse.

Vene l'orator dil re d'Hongaria, per il qual fo mandato nui savj a i ordeni. Pregò la Signoria lo volesse expedir, e si vedesse li danni; e il principe li disse si vederia di consultar et expedirlo.